

期 叁 第

類紙聞新爲認號掛准特政郵華中
據執號柒拾百伍第給發局理管務郵東廣准

中華民國紀元一十有三年十一月十五號出版
孔子降生二千四百七十五年甲子十月十七日

時 中 月 報

孔教研究會編刊

編輯人 趙嶧山
發行人 伍汝舟

所行發總

東廣國中

司公城台·城縣山台
TOY CHEUNG CO.
Tai Shan City,
Canton, China.

時中月報組織條例

第一條 本報以研究孔教。闡發孔子大同之理爲宗旨。名曰時中月報

第二條 本報門類。區分各種如下

(一)曰論箸。凡關於孔教論說。及一切類于論說文字。有關於社會文化與各種實業者。均附此門。

(二)曰經義。凡聖賢格言語錄附此門。

(三)曰演說。專以有關於孔教者爲限。

(四)曰傳記。凡古今聖賢歷史。無論男女。有關於教化者。均附此門。

(五)曰通訊。凡本會及各會友信函。有關於孔教者。均附此門。

(六)曰談叢。凡游記雜說。有關於社會文化者。均附此門

(七)曰文苑。凡古今文辭詩賦。有關於激揚風化。陶淑性情者。均附此

門。

(八)日要聞。凡官廳文牘批示。中外電報新聞。擇要刊登。

第三條 凡送稿來本報者。以各校學生。年考月考。試驗肄業成績。及各城市村鄉之有關於文化實業者為範圍。至若譏評時政。攻訐異教。及損人名譽等論調。概不登錄。

第四條 凡寄新聞來本報者。由本報編輯人選擇登錄。其詞句間有不合者。本報有權刪節。惟無論登錄與否。原稿恕不寄回。

孔教研究會組織簡章

(一)本會定名為孔教研究會其籌辦地址暫附於台山城建台山中學校公所及駐香港台山商會

(二)本會以尊信孔教研究孔子大同之義養成共和國民人格為宗旨

(三)本會無教界種界國界畛域之分無論何項教徒何種民族何國籍民凡男女遵章入會者皆可為本會會員

(四)凡會員入會每人例納會費銀一元以五毛繳納總部爲徽章及各項經費其銀一半彙存於各分部爲注冊及辦事經費倘有學童工人無力繳納會費者准其繳納會費五毛以一半繳總部其餘一半歸各分部

(五)本會總部設立於台山縣城分部設立於各埠鄉市其會員姓名年歲里居及現在職業在各分部注冊由各分部每年照抄一份彙於總部

(六)本會總部分部各設會長一人副會長二人或一人司庫一人書記一人董事或幹事五人至十五人爲會中辦事職員分部正副會長由本會總部選任其餘各職員由各分部會長選派

(七)本會成立之後無論總會分會由各會選出人員在星期日就近向各學堂各村市演講孔教義旨

(八)所有會中詳細章程本總會及各分會會員可隨時條陳總會公同細訂改良

論箸門

孔子大同之學義證

子謂韶。盡美矣。又盡善也。謂武。盡美矣。未盡善也。

此孔子贊歎虞舜官天下之公。而對於周武王之家天下。蓋美猶有憾焉者也。古者一代之興。其功成作樂。執干戈羽籥以歌舞之者。皆所以象其功而昭其德也。故黃帝之樂曰咸池。帝嚳之樂曰六英。顓頊之樂曰五莖。唐堯之樂曰大章。至虞舜紹堯之峻德。而以后夔作大韶。禹成治水之功。而以皋陶作大夏。成湯能護民於塗炭。故伊尹爲之作大護。武王以武定禍亂。故周公爲之作大武。故觀古人之樂。可以知古人之功德。此韶與武之所由區分也。吾先論乎韶。韶固象舜之功德者也。舜上承堯之禪讓。而復以

天下禪讓於禹。開天下後世官天下之局者。其心思至公。其際遇至隆。其所作之韶樂。自足以表示其天下爲公選賢與能之盛德。其聲容固盡美矣。而一究其公天下之心。以禪讓之公德。表示於簫管羽籥之間。固又盡善也。孔子之爲此言。卽不啻以虞舜公天下之德。韶示後人以天下大同之法矣。樂記曰。昔者舜作五絃之琴以歌南風。夔始制樂以賞諸侯。虞書曰。箛韶九成。鳳凰來儀。其美善之極致可以見之矣。

若夫武王之樂。固以征誅得天下。復以世及爲禮者也。觀於孔子與賓牟賈之言。可以知之矣。昔賓牟賈侍坐於孔子。孔子與之言及樂。曰。夫武之備戒已久之。何也。對曰。病不得其衆也。曰。詠歎之。淫佚之。何也。對曰。恐不逮事也。發揚蹈厲之已早。何也。對曰。及時事也。武坐致右憲左。何也。對曰。非武坐也。聲淫及商。何也。對曰。非武音也。子曰。若非武音。則何音也。對曰。有司失其傳也。若非有司失其傳。則武王之志荒矣。

。子曰。唯丘之聞諸萇宏。亦若吾子之言是也。

賓牟賈起。免席而請曰。夫武之備戒之已久。即既聞命矣。敢問遲之遲而又久者何也。子曰。居吾語汝。夫樂者。象成者也。總干而山立。武王之事也。發揚蹈厲。太公之志也。武亂皆坐。周召之治也。且夫武始而北出。再成而滅商。三成而南。四成而南國是疆。五成而分周公左。召公右。六成復綴以崇天子。夾振之而駟伐。盛威於中國也。分夾而進。事蚤濟也。久立於綴。以待諸侯之至也。武王克商。歸馬於華山之陽。放牛於桃林之下。然後天下知武王之不復用兵也。武王之樂。其名爲大武者以此。觀武樂之聲容。武王當日伐暴救民之志事。已流露於總干山立發揚蹈厲之間。其聲容可謂盡美矣。然孔子謂之未盡善者何也。或謂武王以征誅得天下。不如舜之禪讓。是以美猶有憾。史稱武王之伐紂也。木主以行。載文王之伯夷叔齊扣馬而諫曰。以臣弑君。可謂忠乎。父死不葬。爰及干戈。可謂孝乎。

士欲兵之。武王曰。此義士也。扶而去之。往以夷齊之志事。則武之未盡善。謂其於君臣之義。有所抱憾歟。吾謂其不然。孔子之贊革封曰。湯武革命。應乎天而順乎人。革之時義大矣哉。孟子曰。殘賊之人。謂之一夫。聞誅一夫紂矣。未聞弑君也。商紂無道。武王應天順人而革命。孔子舉之。以爲革命之大經。夷齊以臣弑君之言。宜孟子爲武王正辯之也。然則子謂之武盡未善者。以武之功德而言。伐暴救民。固一世非常之大業。可謂盡美矣。至以天下爲一家之私產。視堯舜之天下爲公選賢與能。小康之治。豈可與大同之治。相提而並論哉。孔子之軒韶而輕武。即孔子主張大同之微言。以官天下爲盡善。以家天下爲未盡善之旨也。

籌建縣立女學校舍勸捐啟

倉下道昌
學校校長 梅尹甫

國家之強弱。視乎國民程度之高下以爲衡。國民程度之高下。又視乎女子教育之興替以爲斷。我國開化數千年。殖民四百兆。文物聲明。自古爲地

球冠。何以降至今日。大局岌岌。爲列強所欺凌哉。吾敢一言蔽之曰。女學不興之故。夫我國古來非無女學。故風詩三百。首起關雎。后妃之德。化被諸侯。又如穆姜明易。鄧曼知天。班昭續漢史。宋氏通周官。載之史冊。彰彰可考。無如世事多變。悍夫迂儒。倡無才是德之說。肆巧婦非福之言。橫議流傳。日益深固。於是女學沉淪。國民之程度。亦以之而日下。而國家之衰弱。遂基於此矣。台山縣立女子高等小學校。原名淑慎學堂。爲吾邑女學之嚆矢。創於己酉。經覃前知縣孝方與邑人。費幾許經營。絞幾許心血。始克成立。迄今十有六年矣。成績不無可觀。祇以經費支絀。所有課堂宿舍。及一切校具。不免因陋就簡。缺點特多。課堂僅有兩所。欲分級教授而不能。學生不下百餘。欲留校寄宿而不得。非籌建新校舍。該校前途。斷難發展。現邑中教育界人士。大開會議。再三磋商。擬擇適宜地點。建築宏敞校舍。使容納多數學生。教授管理。悉臻完善。預算

工程約需五六萬金。集腋成裘。用勸善舉。此固刻不容緩之圖矣。夫公益與慈善事業。端在利群。而教育事業。亦爲公益慈善事業之一。而其性質。乃有大異於他種事業者。教育精神的也。他種之事業。肉體的也。教育永久的也。他種之事業。一時的也。如見人疲憊。思賑饋之固善矣。曷若先教以謀生之術。使之自立。而不致受飢乎。見人呻吟。思慰恤之固善矣。又曷若先教以却病之法。使之衛生而不致嬰疾乎。斯果孰爲基本。孰爲標末。都人父老。深識之士。當有以知其故矣。竊思吾邑風氣。素號開通。辦學頗具熱誠。如上澤之成務。下坪之昌平。筋坑之光大。南坑之南州。台城之譚氏。橫湖之劉氏。東坑之日新。倉下之道昌。端芬之海陽。復隆等校之新校舍。先後建築成立。又如最近坎僑捐建台山中學校校舍。今已皇然煥然。莊嚴燦爛。矗立于台城東門之外。男學校舍之注重如此。獨女學絕不過問。而女學校舍。則更腦后置之。除基督教會人所辦之剛德綱紀

慎從德諸女學不計外。女校寥寥。誠怪象也。彼蒼之生人。非男卽女。男與女。均是人也。何爲厚於男而薄於女。豈以男承宗祧。女則嫁諸人乎。此等謬見。纏惑不解。是以釀成半文半野之譏。貽羞外國。豈知我女嫁諸人。而人女亦嫁諸我。我女劣。人女亦劣。輾轉相尋。而社會之分子。遂麻木了二分之一。所以家庭母妻嬸姆姊妹之倫。皆不明天下之大勢。世界之潮流。拘牽齷齪。不可與言。此於兒童幼稚之時。必不能得家庭之教育。與學校之教育。息息相關。合力而養成大好國民之資格。並使壯年男子。有學術之思想。政治之能力者。亦爲家庭牽累。而無形之中。不可告人之處。生出無窮之阻力。以銷磨其志氣。更何望其有所贊助。以圖進取。凡古來名人豪傑。其母若妻。未有不賢明者。有孟母然後有亞聖。無樂妻（樂羊子之妻）安能成大賢。有華盛頓之母。然後有共和偉人。無拿破崙之妻。安能成革命鉅子者耶。由此觀之。邑中之女學不興。不惟一邑女子。

盡棄爲無用之物。並且累及一邑男子。皆歸於無用之地。以如此之國民。而欲競存於今日澎湃之旋渦。烏可得乎。爲今之計。惟有通力合作。踴躍捐輸。慷慨仗助。俾該校校舍。詳爲計劃。妥爲設施。尅日成立於三台城中。與東門外之中學校舍。內外互相輝映。以應教者之需求。而饜學者之願望。其收效自當事半功倍。卓然而表著者。則教育亦不致徧重於男學。將見婉婉處子。日進於文明。翩翩令孃。月增其淑德。相夫訓子。咸有義方。足以養成高尚之德性。消化粗暴之氣質。添助活潑之精神。增進勇敢之雄心。家庭教育。以之愈改良而愈達於優點。從茲各邑各省女學。咸以吾邑女學爲模範。風行全國。國民之程度。蒸蒸日上。則我國之強。可立以待。何患不能與歐美並駕齊驅者乎。此吾邑莫大之光榮。而女界中不可思議之功德也。諸女士其樂聞歟。其皆大歡喜歟。所願海內外伯叔昆仲。諸姑姊妹。有吾邑一分子之責者。盡力而爲之。吾不禁嚶嚶以祝之矣。

中華民國十三年十一月一日

邑人梅尹甫謹啓

經義門

孔教之戒律

少之時。血氣未定。戒之在色。

及其壯也。血氣方剛。戒之在鬪。

及其老也。血氣既衰。戒之在得。

右爲君子有三戒之目。孔子舉之以示人者也。君子、指學者。謂其有志於希聖希賢者而言。學者讀書。須以做到聖賢地位自命。但人人爲學。而能做到聖賢地位者卒鮮。此何故哉。蓋以血氣之性。有時而偏。不違天理之軌道故也。少之時偏於好色。壯之時偏於好鬪。老之時偏於貪得。以血氣之人欲。亂其性中之天理。雖欲爲聖賢而不可得矣。君子之爲學也。無時不以好色好鬥貪得爲戒。然後能以義理之性。御其血氣之性。不使血氣

之欲。隨時見可欲而橫決。以孔門弟子。尙云入見孔子之道德而悅。出見紛華而亦悅。可知以義理駕御血氣之難。孔子見爲學之君子。無不以戒懼慎獨。爲入德之方。血少則戒之在色。以血氣未定時。易爲色迷也。壯則戒之在鬪。以血氣方剛時。易開鬥釁也。老則戒之在得。以血氣既衰時。身家之念重。易於貪得也。隨時致戒。乃能隨時不悖於義理。篤學之君子。其隨時自警如此。此其所以能希聖希賢。而不至於墮落。自棄於士君子之林也。孔子諄諄然教學者如此。後之學者。能隨時奉此三戒。銘諸座右。亦可以無大過矣。

經義

區漸達

大學子曰。聽訟吾猶人也。必也使無訟乎。無情者不得盡其辭。大畏民志。講此章者。使無訟句。大率以德禮爲根本。畏民志句。自然是德禮之成效。然則此節。直道德齊禮章之化粧耳。余意不然。何以言之。自唐虞以

來。直可斷爲從無訟之一日。有之。則皇古之部落。及我人夢嚙中之大同耳。訟獄不之堯之子。宥殺爭於皋之庭。是明明無訟難期。唐虞猶病也。故講此書者。須知聖人非高談德禮。實係注重法律一邊。聽訟吾猶人句。言吾亦猶人之尊重法律也。夫孔子時之法律。果何如哉。蓋文武周公所留貽。而參酌前代。審合國情。之所規定也。獨是法令者治之具。而非制治清濁之原。必也使無訟。其庶幾到治之隆軌乎。此句如文章中。之揚筆。乎字非冀幸之詞。乃歎絕之詞。急以無情者二句轉下。所謂聖意注重法律也。太史公論列。老莊而後。不廢申韓。夫子若曰。無訟不可期。則道德之窮。法律必軋于至當。無情者欲盡其辭而不得。孰制之。法律足以制之也。無情之大者。曰姦拐命盜。殺人者死。強姦者斬。拐人口者。就地正法。治盜賊者。必用重典。落落諸大端。咎由自取。何說之辭哉。所謂無情者不得盡其辭。其義如此。故此句不是高談德禮。言非有此至當之法。

不足以濟德禮之窮也。吾觀此言。而不禁爲今日之法。喟喟以悲矣。按新刑律。拐人妻者。拐去另婚。非與後婚夫離異之後。雖其本夫。告訴無效。是使拐人者得盡其辭也。殺人論死之外。法官又可以伸縮爲無期。及一等有期徒刑。是使殺人者得盡其辭也。姦處子孀婦。不論爲強爲誘。於律無罪是使姦人者得盡其辭也。訊問盜賊。禁用威嚇。及詐罔之辭。是使執法者不得盡其辭。而反縱盜賊以得盡其辭也。此第舉其大者。實則全部新刑律。強半激清揚濁。顛倒是非之條。質而言之。則違反民志而已。夫子曰。文武周公所規定之法。雖非無訟極軌。要能使無情者不得盡其辭。蓋其立法之善。實由參酌前代。審合國情。然後垂爲憲典。其大畏民志如此。而豈今日新刑律之謂哉。講此畏字。應與尙書。願畏民瘼之畏字同義。乃老師宿儒。動輒講作民志大畏。不知大畏民志。乃聖人語重心長。爲後世之立法者告也。奈何巔倒其詞乎。若夫民國定律之始。舉五千年典章禮

律。掃而空之。取四百兆怨咨好惡。毅然反之。所謂民國新刑律者。直可謂之目無民志也已。夫國不可無法。更不可無文武周公。參酌前代。審合國情。可垂久遠之大法。乃一任人格不一之法官。各就其游學之國。借用數萬里外。風俗歷史絕異之律。拉雜鑿柄。悍然施行於我國中。其心目間。豈尙有所謂民志者哉。夫子此節之意。無訟句最輕。明知爲堯舜猶病。終古難期之事。但使立法者。首先尊重民意。則行法者。可以禁格無情。執而施之。時謂祥刑。馴而改之。庶幾刑措已。嗚呼民志。嗚呼新刑律。法天黯黤余欲無言。

謹按區達初解元。平素博通經義。深諳法律。故其歷任懷遠從化東安等縣知事。洞達民情。剖晰訟案。人民翕然心服。有漢儒以經義斷獄之風。今讀此經義。知先生治獄。以審合國情。如英人重習慣法之例。通儒作事。自與俗吏不同。於此文可窺見一斑。記者注。

讀論語(二續)

日本早稻田大學
學法科學士 陳紹人 伯嚴

子曰聽訟吾猶人也必也使無訟乎

此數語可謂爲司法官之座右銘。今日之司法官。獨斷斷于枝葉救濟。而不注意于根本解決。誠非法治之上乘也。

子適衛冉有僕子曰庶矣哉冉有曰既庶矣又何加焉曰富之曰既富矣又何加焉曰教之

管子云。衣食足而後禮義興。是人類自然之結果。孔子爲政。先着眼乎此。足見孔子之政治的經綸。尙實際而不尙空疏也。

子貢問政子曰足食足兵民信之矣子貢曰必不得已而去于斯三者何先曰去兵子貢曰必不得已而去于斯二者何先曰去食自古皆有死民無信不立

此即富國強兵。教化風行。國民信仰之條件也。然其主腦在于國民之信。而國民之信。基于爲政者之自信。所謂先正己而後正人。先自信而後人信

之。此理自古及今。莫之或易也。其爲政以德之真諦。全在乎此。然則孔子之如何注重富國強兵。從可識矣。

由此觀之。孔子之政治論。正大而不疏濶。切實而不淺薄。亦可以見之矣。其所說無論如何之人種。如何之時代。如何之政體國體。無不可行。且不可不行者也。爲政治家之孔子。其實際上之手腕。雖未得十分試驗。然其救世之苦志。不能自禁。或赴齊。或適衛。或往陳蔡宋葉。甚至在位而見靈公之寵姬南子。又欲應公山不狃之召。而冀作東周晉趙氏家臣。佛肸以中牟叛。猶欲往之。迹其所爲。頗似臨機應變之策士一流人物。不知孔子救世之熱誠。及其宅心之真實。至是又可得而見也。彼非虛無寂滅。而偏于理窟之理想家。常欲努力奮鬥。以實現其志願者也。其觸于政治上之結果。恰似儀波氏之爲民兵官。其所傳授之智識。雖不爲模範軍人。然使解羅馬古代之兵事。欲不謂之爲良好之歷史家不可得也。若論孔子之政

績。似未能比于管仲。然其爲政治的教訓。則遠在管仲之上。卽周公亦不如也。此吾人所以崇拜孔子。非崇拜其爲大政治家。實崇拜其爲大教訓家也。孔子之頭腦。常印有兩個人物。卽周公與管仲是也。孔子生平以周公爲其政治的理想之標準。以管仲爲其次。周公者周代之梭倫。彼之立法的技能。以周之天下爲其試驗場。禮樂制度。燦然大備。逮至春秋。干戈既開。競爭漸烈。周公之法制。遂致破壞。不堪補綴。孔子則爲其補綴之肖子。而以第二之周公爲期許者也。


子曰如有周公之才之美使驕且吝其餘不足觀也已
此數語。是何等贊美。是何等崇拜。蓋卽其平素所自期許者。不覺衝口而出者也。

子曰甚矣吾衰也。久矣吾不復夢見周公。

使千載下猶聞其歎息之聲。晚年事與志違。而其志不能自禁。總在未死以

前。猶欲行周公之道也。

彼雖以周公爲理想的人物。然居常自爲比較或反照者。則爲管仲。彼對其管仲其人。或不甚滿意。但對於其事業。深所期許。所謂不得已而思于次者歟。



台山女子家庭織造公司告白

本公司在台山縣城內正市街門牌五十二號、特聘省垣有名女師教授織造各種男女線襪絲襪土布毛巾唐洋刺繡、兼且晚間停機時候、教讀夜學、課程率照部定、以副半工半讀爲宗旨、各鄉有志蒞學者、請向各就近代理處報名、或至本廠掛號、無不歡迎、再者本織造廠營業場、發行本廠自織土布毛巾絲線綿竹紗男女襪牙刷、兼辦金銀首飾蘇穗雜貨、海外華僑、有志振興土貨者、函示自當依期辦到、或由省港分銷處過附、率聽 尊便、諸君光顧、尙祈查照門牌通函並親到議訂爲禱

正主任余少屏
副主任鄭淑珊 謹識

演說門

道昌學校開幕演說詞

倉下鄺氏旅外洋昆仲、捐金建築道昌學校、開幕之日、請宗壇到禮堂演說、其詞曰、

諸君、今日蒙貴主席請宗壇來道昌學校演說、得與諸男女教習、暨諸男女學生、諸來賓先生、千數百人相見於堂、深爲欣幸、宗壇敢不以愚者千慮一得之見、貢獻於諸君之前、今日貴學校開幕、並聯合鄺氏各學堂男女學生、暨各學生之父母、各捐款之善士、及其家人、開一懇親大會、又在學校中陳列學生文藝、開一學生成績展覽會、此誠貴族文化發展、宗族敦睦之一大好時機也、吾甚敬仰之、忻慕之、然吾思貴族出洋兄弟、何以捐款鉅萬、如此之熱心、貴族各鄉之學堂、何以男女學生、爲此懇親大會、貴

族各校學生、文藝何以有此成績、能開博覽、誰爲爲之、孰令致之、則以貴族父老昆弟、深得孔子之教化爲之也、何以言之、孔子之教、一在於親親而仁民、其著於禮經以垂訓者、曰孝友、曰嫺睦、曰任恤、今鄺族昆仲、知子弟之宜教誨也、於是立學校以教誨之、卽孔教中也差不中、才也養不才之義、此賢父兄之行爲也、其捐款建校也、或千百數焉、或百十數焉、不惜以汗血所得金錢、爲鄉族子弟建學之用、以體祖宗教子孫之意言之、則爲孝友、以親愛鄰里言之則爲嫺睦、以慷慨好施言之則爲任恤、皆由於孔教親親仁民之理、深入於腦海、故能慷慨捐輸以成此捐建學校之其美舉也、

孔子之教、有曰尊祖敬宗、敬宗故收族、蓋以同姓之親、本於祖宗之一脉、今日族中之父老子弟、與夫族中之男女學生、分之固數千百人焉、若溯之千百年以前、則此數千百人、同爲祖宗之一人而已矣、今鄺氏學董、

體尊祖敬宗收族之義、合各鄉之男女學生、同聚於一堂、開一懇親大會、使知今日堂中之千數百人、在千數百年以前、實同爲祖宗之一體、使一族中之少年子弟、既各明乎此理、則同族之中、毋以衆暴寡、毋以強陵弱、毋以智欺愚、各盡乎互相愛敬、毋相殘賊之道、此懇親會之精意也、况由同姓之懇親、而推之於異姓、擴充其量、即爲聖人能以天下爲一家之誼、今日堂中來賓、有鄺姓者焉、有非盡鄺姓者焉、濟濟一堂、其懇親之意、如兄如弟、此又得孔子敬而無失、恭而有禮、四海皆兄弟之義也、孔子之教、以宗教而兼有教育之義者也、其教人在孝弟謹信、汎愛親仁、此卽道德教育也、及行有餘力、則以學文、文者指詩書六藝而言、六藝者、禮樂射御書數之謂也、數者即九章算術、今日學校中男女學生所常習者也、書即學校中之寫字、射即學校中之兵式體操、持鎗以習射擊者也、戰國以後、樂經雖亡、而樂章之載於詩經者、如關雎鹿鳴今猶可考、學校中

之樂歌、孔子時固常有之、今日貴學校中所陳文藝之成績、使各校生得以互相觀摩、各處來賓、得以交相讚賞者、皆遵孔子餘力學文之訓、是以能各奏其技、助今日開幕之大慶也、

吾更有不忘者、孔子之教、固無所不備也、得其一言、固足以收無窮之效果、况其全體之大綱、更足以範圍我中國四萬兆民族、使之相親相愛、固結一大團體而不可解散者哉、其大綱維何、即父子有親、君臣有義、夫婦有別、長幼有序、朋友有信、是也、此尤諸君所宜注意者、我中國人同在此五倫之中、已二千四百餘年矣、人人遵行孔教、幾如著衣喫飯、日用常行、無一日可以斯須去諸身也、今吾說明孔教之效果、隨處皆是、今日開幕中所見之事、無一非由孔教而來、在座諸學生、其各知以孔教爲道德教育之要務、他日學成名立、以之施行於家國天下之間、則共和之盛治成矣、宗壇謹以此老生常談之言、就正於諸君、

孔聖誕日演講孔教

冲英區袁少枚
克承學校教員

孔子降生至今二千四百七十餘歲矣、其身體雖沒、其精神尙存。如日月經天、江河行地、萬古不廢者、以其教合國情、爲中國之大教主、乃我中國之國魂也、有是魂則國存、無是魂則亡、猶人之病入膏肓、無可救藥矣、論者曰、今之民國、政體改爲共和、自由平等、似與孔子教異、孔子之教、何以謂之爲國魂乎、吾應之曰、孔子之教、以五倫治天下、五倫之理、即倫理也、倫理之不可沒、猶五常五行之不可缺、今共和初基、可無皇帝、不能無總統、今之總統、卽守法律、有任期之皇帝而已、瑞士不立總統而立議長、議長亦總統之別名詞、君臣之名號雖除、君臣之寔義仍在、若並其實而去之、則今日亦可以不立總統、不用省長、不用縣長矣、吾知其不能也、夫皇帝之制、宜於據亂小康之世、若大同之世、可以廢皇帝矣、然不能廢總統、孔子之學、則由據亂世而升平世而太平世、天下爲公、選賢

與能、卽今日民主國選舉總統之制也、且孔子作春秋、譏世卿、漢時去世爵、布衣之士、可爲公卿、諸經之義、人民不奴、光武大行放奴、已先於美總統林肯二千年矣、何嘗不平等也、孔子之教、祖述堯舜、堯欲讓位、四岳以鰥居側陋之虞舜薦、舜自居攝以至受終文祖、四凶嘗服無詞、舜於耄期倦勤、亦以四岳交推故、讓大位於禹、其時如臯陶后稷益契及伯夷夔龍朱虎熊羆輩、均皆恪守臣節、日贊襄而靡有三心、中國文明開幕第一期、道德選舉之和平、天下後世之選舉、無有如此之就範者、此其共和行於帝政之日也、孔子之教、重法紀、嚴秩序、入孝出弟、徐行後長、師傅則尊崇之、耆老則敬禮之、言行相顧、動必以禮、男女別其嫌疑、醜聲不聞於衆、禮俗從乎習尙、改制肯會其通、鄉黨一冊、代表全身、語曰、孔子家兒不知罵、曾子家兒不知鬥、不罵不鬥、共和之真相、於此造端矣、此其共和之見於日用也、如上所述、孔子之教、無一非共共和也、謂之爲國

魂、豈虛語哉、然則孔子之教、天下之公理也、以天下之公理、爲天下之公教、不特可以教中國、尤可教萬國也、况乎今之中國、方萬餘里、猶龐然亞洲之一大國也、廿二行省猶存在也、蒙古青海西藏猶藩屬也、四萬萬人民猶繁盛也、土廣人衆、圖強易易、我國人民苟知尊重孔教、同心合力、蓬蓬然發展其大同太平世之原理、則五州萬國之人民、亦同遵我孔教之軌道矣、倘空言共和、不以孔教爲本務、六經而覆醬、四書而燒薪、蕩檢踰閑、詡詡然曰我自由、我平等、而不計此外不自由不平等之人、則教猱升木、爲虎作倀、適以養成無禮無義、犯上作亂、獸言獸行、亡國滅種之人才、坑我中國四萬萬人於長平而已、何也、共和、政體之最美者也、民治之盛軌也、而第摹倣其美名、鋪張其法律、無文明道德以濟之、是以卒得其反、不共不和、同室操戈、黨爭日劇、丁此時期、吾謂合華盛頓俾斯麥嘉富洱諸偉人之武力、冶以一爐、備於一身、奮起而掃除共和之障礙、

窃恐一障礙去、一障礙復來、輾轉相尋、禍生無已、法國八十三年之大亂、墨西哥三百年之大亂、殺人如麻、其浩劫將見於我神州矣、孔子曰、道之以政、齊之以刑、民免而無恥、道之以德、齊之以禮、有恥且格、欲共和之成、舍此固無由也、舍孔教而言共和、如猴戲面具、優孟衣冠、是假共和、非真共和也、假共和、則國魂去矣、如欲救之、亟以孔子之教爲良方、痛下鍼砭、當可還我國魂、而相慶延年矣、嗚呼共和、烏能不尊孔、吾深望我孔子禮記大同春秋太平之學說、發輝光大、蒸蒸日上、使吾國魂無災無害、與天地相悠久無疆也、或有一知半解、謂我頑固、囁我守舊者、此盲聾之人、吾徒當安然受之可勿與辨、

傳記門

仲尼弟子列傳

曾參。魯國南武城人。字子輿。少孔子四十六歲。孔子以爲能通孝道。故以孝經傳之。其孝經有曰。仲尼居。曾子待。子曰。先王有至德要道。以順天下。民用和睦。上下無怨。汝知之乎。曾子避席曰。參不敏。何足以知之。子曰。夫孝。德之本也。教之所由生也。復坐。吾語汝。身體髮膚。受之父母。不敢毀傷。孝之始也。立身行道。揚名於後世。以顯父母。孝之終也。夫孝。始於事親。中於事君。終於立身。大雅云。無念爾祖。聿修厥德。

曾子曰。若夫慈愛恭敬。顯親揚名。則聞命矣。敢問子從父之令。可謂孝乎。子曰。是何言歟。是何言歟。昔者天子有諍臣七人。雖無道。不失其

天下。諸侯有諍臣五人。雖無道。不失其國。大夫有諍臣三人。雖無道。不失其家。士有諍友。則身不離於令名。父有諍子。則身不陷於不義。故當不義。子不可以不諍於父。臣不可以不諍於君。故當不義。則諍之。從父之令。及焉得爲孝乎。

曾子既傳孝經其則教弟子。立多孝弟之言。大戴禮記大孝篇。曾子曰。孝有三。大孝尊親。其次不辱。其下能養。公明儀問於曾子曰。夫子可謂孝乎。曾子曰。是何言歟。是何言歟。君子之所謂孝者。先意承志。諭父母於道。參直養者也。安能爲孝乎。身者、親之遺體也。行親之遺體。敢不敬乎。故居處不莊。非孝也。事君不忠。非孝也。蒞官不敬。非孝也。朋友不信。非孝也。戰陣無勇。非孝也。五者不遂。災及乎身。敢不敬乎。故烹熟鮮香。嘗而進之。非孝也。養也。君子之所謂孝者。國人皆稱願焉。曰、幸哉。有子如此。所謂孝也。民之本教曰孝。其行之曰養。養可能

也。敬爲難。敬可能也。安爲難。安可能也。久爲難。久可能也。卒爲難。父母旣沒。慎行其身。不遺父母惡名。可謂能終也。夫仁者。仁此者也。義者。宜此者也。忠者。中此者也。信者。信此者也。禮者。體此者也。行者。行此者也。彊者。彊此者也。樂自順此生。刑自反此作。夫孝者。天下之大經也。夫孝、置之而塞於天地。衡之而衡於四海。施之後世而無朝夕。推而放諸東海而準。推而放諸南海而準。推而放諸北海而準。詩云。自西自東。自南自北。無思不服。此之謂也。孝有三。大孝不匱。中孝用勞。小孝用力。博施備物。可謂不匱矣。尊仁安義。可謂用勞矣。慈受忘勞。可謂用力矣。父母愛之。喜而不忘。父母惡之。懼而無怨。父母有過。諫而不逆。父母旣沒。以哀祀之。加之如此。謂禮終矣。樂正子春下堂。而傷其足。傷瘳。數月不出。猶有憂色。門弟子問曰。夫子傷足。瘳矣。數月不出。猶有憂色。何也。樂正子春曰。善。如爾之問也。吾聞之。

曾子。曾子聞之。夫子曰。天之所生。地之所養。人爲大矣。父母全而生之。子全而歸之。可謂孝矣。不虧其體。可謂全矣。故君子頃步之不敢忘也。今予忘夫孝之道矣。予是以有憂色。故君子一舉足。不敢忘父母。一出言。不敢忘父母。一舉足不敢忘父母。故道而不徑。舟而不游。不敢以先父母之遺體行殆也。一出言不敢忘父母。是故惡言不出於口。忿言不及於己。然後不辱其身。不憂其親。則可謂孝矣。

事父母篇曰。單居離問於曾子曰。事父母有道乎。曾子曰。有。愛而敬。父母之行。若中道。則從。若不中道。則諫。諫而不用。行之如由己。從而
不諫。非孝也。諫而不從。亦非孝也。孝子之諫。達善而不敢爭辨。爭辨者。作亂之所由興也。由己爲無咎則寧。由己爲賢人則亂。孝子無私樂。父母所憂。憂之。父母所樂。樂之。孝子唯巧變。故父母安之。若夫坐如
戶。立如齊。弗訊不言。言必齋色。此成人之善者也。未得爲人子之道也。

○單居離問曰。○事兄有道乎。○曾子曰。○有。○尊事之。○以爲己望也。○兄事之。○不遺其言。○兄行若中道。○則兄事之。○兄之行若不中道。○則養之。○養之內不養於外。○則是越之也。○養之外不養於內。○則是疏之也。○是故。○君子內外養之也。○單居離問曰。○使弟有道乎。○曾子曰。○有。○嘉事不失時也。○弟之行若中道。○則正以使之。○弟之行若不中道。○則兄事之。○諛事兄之道若不可。○然後舍之矣。○

疾痛篇曰。○曾子疾病。○曾元撫首。○曾華抱足。○曾子曰。○微乎。○吾無失顏氏之言。○吾何以語汝哉。○然而君子之務。○盡有之矣。○夫華繁而實寡者天也。○言多而行寡者人也。○鷹鷂以山爲卑。○而曾巢其上。○魚鼈龜鼉以淵爲淺。○而蹶穴其中。○卒其所以得之者餌也。○是故。○君子苟無以利害義。○則辱何由至哉。○親戚不悅。○不敢外交。○近者不親。○不敢求遠。○小者不審。○不敢言大。○故人之生也。○百歲之中。○有疾痛焉。○有老幼焉。○故君思其不復者而先施焉。

○親戚既沒。○雖欲孝。○誰爲孝。○年旣耆艾。○雖欲弟。○誰爲弟。○故孝有不及。○弟有不時。○其此之謂與。○言不遠身。○言之主也。○行不遠身。○行之本也。○言有主。○行有本。○謂之有聞矣。○君子尊其所聞。○則高明矣。○行其所聞。○則廣大矣。○高明廣大。○不在於他。○在加之志而已矣。○與君子游。○苾乎如入蘭芷之室。○久而不聞其香。○則與之俱化矣。○與小人游。○貸乎如入鮑魚之次。○久而不聞其臭。○則與之俱化矣。○是故。○君子慎其所去就。○與君子游。○如長日加益。○而不自知也。○與小人游。○如履薄冰。○每履而下。○幾何而不陷乎哉。

天圓篇曰。○單居離問於曾子曰。○天員而地方者。○誠有之乎。○曾子曰。○離。○而聞之云乎。○單居離曰。○弟子不察。○此以敢問也。○曾子曰。○天之所生上首。○地之所生下首。○上首之謂員。○下首之謂方。○如誠天圓而地方。○則是四角之不揜也。○且來。○吾語汝。○參嘗聞之。○夫子曰。○天道曰圓。○地道曰方。○方曰幽

而圓曰明。明者吐氣者也。是故外景。幽者含氣者也。是故內景。故火曰外景。而金水內景。吐氣者施。而含氣者化。是以陽施而陰化也。陽之精氣曰神。陰之精氣曰靈。神者品物之本也。

記者按曾子天圓篇不信地方之說。凡經書所言地方乃指其德之月定而言。非謂地形之方也。觀此。春秋時學者。已知地爲圓周矣。

曾子在孔門中。質最魯。年最少。然孔子之道。卒傳於曾子。曾子曰。吾日三省吾身。爲人謀。而不忠乎。與朋友交。而不信乎。傳不習乎。孔子曰參乎。吾道一以貫之。曾子曰唯。子出。門人問曰。何謂也。曾子曰。夫子之道。忠恕而已矣。曾子曰。士不可以不弘毅。任重而道遠。仁以爲己任。不亦重乎。死而後已。不亦遠乎。

曾子傳孔子之道。作大學以明內聖外王之統。小戴禮記其大學一篇曰。大學之道。在明明德。在親民。在止於至善。知止而後有定。定而後能靜。

靜而後能安。安而後能慮。慮而後能得。物有本末。事有終始。知所先後。則近道矣。古之欲明明德於天下者。先治其國。欲治其國者。先齊其家。欲齊其家者。先修其身。欲修其身者。先正其心。欲正其心者。先誠其意。欲誠其意者。先致其知。致知在格物。物格而後知至。知至而後意誠。意誠而後心正。心正而後身修。身修而後家齊。家齊而後國治。國治而後天下平。曾子既作大學。傳孔子之道。即以孔子之道。復傳諸子思。子思孔子之孫。伯魚之子也。史稱孟子受業於子思。私淑於孔子云。



通函門

閱報諸君公鑒。敬啓者。本時中月報。以提倡孔教爲務。是以同人招集股份。聘請通人。編輯關於孔教之文。及採擇時事之緊要者。附刊報端。每期計刊刻二千本。分送各學校及各社會各通人閱看。原欲推廣風氣。俾孔子之道。大明於天下也。惟寄閱之後。回信稱已收到。或將該處月刊付來交換。及查照本報末幅價目表。滙來報價者固多。其或因事繁忙。收到本報不暇回函者亦復不少。茲特函請閱報諸君其有收到本月報者賜回一函。并請閱報諸君。或代本報介紹別人購閱。或撰述有關於提倡孔教之文。寄來本報。俾得刊登。或查照組織分會章程。由貴處另設孔教分會。至分會與本總會相通。聯絡一氣。固所歡迎。或以省縣遙隔。自立一孔教

會。自爲總會。獨樹一幟。但使有益於孔教。本會亦深爲馨祝。分道揚鑣。各盡能力。爲我國教之干城。因本會同人之願也。肅此敬候
德安。希惟 恕照不備。

中華民國十三年十一月 日

孔教研究會同人敬上

嶧山先生青鑑。敬啓者。吾台山偏處國之東南。民多僑外。吸歐美各國風氣。時有文明舉動。但人心澆薄。風俗奢靡。煙賭盜賊之事。不絕于報章。欲施救之策。必以正人心風俗爲急務。至其下手之方。莫如倡明孔教也。先生遍遊英美。整駕回國。欲爲海內人民。一振木鐸。醒其迷夢。特設孔教研會。編輯時中月報。其來日之結果。必有非常可喜。爲我國之中流砥柱者。澤漢才雖學菲薄。但念國家興亡。匹夫有責之義。願珥筆以隨先生之後。將孔子大義微言。或抒一得。茲謹呈稿一編以供高明之選焉。此請

道安

趙澤漢鞠躬

嶧山夫子道鑒敬稟者。六月初旬。趨謁函丈。藉聆清誨。飭作論說。久未呈上爲歉。受業自念以六十二歲之窮學究。未遊歷寰球各國。未徧讀百國寶書。胸中醞釀甚少。遽抒所見。恐閱者胡盧。第竊有所見。敢呈諸座右。懇加意訓誨。亦求益之道也。

夫子宦遊美洲十七八年。以國學湛深之儒。與新大陸文明政學兩界相接。所得歐美新學識甚多。故自太平洋海歸來。即立孔教研究會。兼任時中月報編輯。發揮禮運孔子大同義旨。爲吾共和國民造無窮之倖福。吾國學者。從此得一正當教義。不至爲邪說所惑。受業從此講學。亦得依歸矣。夫子誠爲孔教之功臣哉。此請

道安

受業袁丙煌呈

大成公司

TAI SING CO.
Suck Far Road
Sai-mon City,
Toy-shun, Canton,
China.

廣東台山縣

西門石花路

第三期

本公司集資經營銅鐵洋貨各種玻璃星鐵鉛鐵水
壳唐番色料發行生意並聘技師製造大小機器各
款鐵門鐵閘夾萬井樞欄杆諸君光顧毋任歡迎
兼接理外洋各埠兄弟戚友書信銀兩凡各梓里有
銀信是希直買担保由本公司寄回弟等定然悉心
料理妥當希水從優給回交銀快而回信速決無阻
滯之理如蒙見托請將上列中西文字門牌寫明寄
來永無錯悞此佈

總理 黃信傳

司理 黃普傳
余潤欽

披露

四

叢談門

紐約之鐵橋

海客談瀛錄

紐約之鋼鉄綫橋。自旅美紐約回國者。幾人人購此一種奇畫。以分贈親友。蓋以此鋼綫橋。爲環球橋樑之大觀。故撮其影以表示諸世界也。查紐約一埠。其地形如一人伸臂舒掌於海灣。作一長臂形。兩河夾其隈。以達於海灣之南。越西河爲紐者泚省。越東河爲補碌崙。紐約之南稍廣。逾北甚狹。從中間濶街東西望之。兩河岸一目了然。南北之長。樓宇所已建築居住者。數拾里而未盡。東西相望。祇兩里許而已。以市民之數計之。近時該埠已有七百萬。乃歐美交通之咽喉。商舶林立。工廠雲連。其民居樓宇。動以四層至六層爲率。幾有無地可以容人之患。欲擴充地盤。則爲兩河所制。若越河而西。又移民於別省。非紐約省之利。於是越河而東。向補

碌崙發展。欲將補碌崙與紐約。兩地佳場。合爲一區。非有橋爲之連合不可。此紐約鋼鐵橋之所由築也。美爲環球最富之國。紐約又爲美國最富之埠。故能以天下最宏偉之工程。施於其間。觀此鋼鐵綫橋之宏偉。可以証美國財力之富厚矣。吾嘗步行此橋。細考其工程者兩次。計此橋在紐約市政廳之左。其結橋之起點。橋之首尾。各伸入市內陸地。約當八英畝之長。故鐵橋之中腰底層能任西洋檣帆船在橋底自由出入。至此鐵橋之高。中分三層。下底一層。中央行鐵軌火車。兩旁行街上鐵軌電車。中間一層行馬車及汽車貨車頂上一層爲人行路。路之旁陳列坐几。倦行者坐此休息焉。

予察其構造之法。驟看之似甚煩難。細看之亦極容易。其工程在河兩旁。各築兩對門之高石柱。復以鐵環絡之。使之極其堅固。然後將一鋼鐵大纜。加乎石柱之上。又計算此鋼鐵綫纜之垂弧力。離若干遠。任若干重。然

後密密以小鋼鐵線懸鐵板以爲橋身。試望鐵橋圖中所懸之鋼線如織。皆以小鋼線懸於大鋼線之下。其得力之處。全在於兩頭石柱。擎起此一大鋼線以爲之綱焉。

予察其間鋼綫建築已久。塵埃蒙穢。不如攝影畫中者之尙覺鮮潔也。但茲卅餘年。只此鋼綫橋一度而已。至今則工程之學日進。從紐約築鐵橋過補碌者。已有四五度矣。但其橋甚低。橋底不能容船出入。每洋船過時。須有人將中間橫關扭開。其鐵橋之橫欄河面者。令轉捩之而使其直向。以便洋船之來往。船既過。復轉捩而續扣之。使復爲橋梁以便人車之來往。此補碌崙與紐約。今已儼若聯合爲一區也。

紐約之鋼鐵綫橋。既如上述。此橋固已震驚環球矣。然以一九零九年以後。紐約中央公園東邊所築之鋼鐵株橋比較之。則前築之鋼鐵綫橋爲舊式。後築之鋼鐵株橋爲新式。已遠過乎舊者之上矣。查此鐵株橋。係紐約專門

學堂畢業生所建築。該學生深於工程。重學力學尤為請密。予亦曾細察此橋工程焉。但見其橋之兩旁。用鐵株三角交加。互相撐柱而已。吾無工程學。未能說出其所以能互相支撐。自能互相擔力之處。吾過此橋時。適當一九一一年。落成未久。橋之上尙有多少工作未竣也。舊鋼鐵綫橋。乃以大小鋼綫。懸斯橋於空中。故火車之經過也。此橋尙有震動。若此鐵株新式之橋。車馬往來。如行陸地一樣矣。此橋亦分三層。最下一層。中間為火車軌道。兩旁為電車軌道。中間一層為汽車馬車所經。若頂上一層。為行人往來之路。其路為英坭石仔所築。海風吹掃。靜無纖塵。橋之兩旁。置長鐵几。婦人孺子。夏天坐游其間。披襟以當海風。南望洋船而入者。皆從吾足下過。綠女紅男。不覺若步虛仙子也。

尊孔談

水口紅花
學校校長 馮麗濤

閱時中月報第一冊。諸君闡發孔教精義微言。可云盡致。惟願行之以誠。

乃不爲空談也。中庸云天下之達道五。所以行之者三。曰君臣也。父子也。夫婦也。昆弟也。朋友之交也。五者天下之達道也。知仁勇。三者天下之達德也。所以行之者一也。一者何也。曰誠也。果誠以行之。則舟車所至。人力所通。天之所覆。地之所載。日月所照。霜露所墜。凡有血氣者。莫不尊親矣。推之盡人性以盡物性。禽魚草木。亦被涵濡。則吾夫子致中和。天地位。萬物育之道在是矣。


民律草案條理應改天理談

法律學士 梁漢藩

我國民律草案。第一條。條理二字。鄙人以爲應取天理二字。何也。詩曰。天生蒸民。有物有則。民之秉彜。好是懿德。此語之義。精深奧妙。欲盡其辭。累萬紙而不能休。今借此語以解釋法文。天生蒸民之民。卽是民事之民。有物有則之物。事也。卽是民事之事。有物有則之則。法也。卽是民法之法。天既生此蒸民。必不能無事。卽亦不能無法。但此關於民事之

法。其在時空也。千變萬化。千頭萬緒。列而舉之。雖恆河沙數。學者分任其責。亦經佛刹微塵數。劫而未能有盡也。今欲以有限之條文。而馭不可紀極之民事。且欲於事物之來。而一一有所準據以應之。其事之爲不可能。不待智者而後知也。然則將如何而後可。有物可不必有則乎。是又不然。窮而濟之。有二術焉。其事件之來而熟也。而次數多也。則其事之見於時間。也不止一日。見於空間。也不止一地。昔日作而今日效。彼地唱而此地和。其先例定式之見於昔日。載於書史。成於異地。而傳於口碑者。不可勝計。是則所謂習慣法也。此之慣例。習之既久而相安。行之異地而皆準。其與法理相衡。雖不中不遠矣。民律第一條謂民事本律所未規定者依習慣法之言。殆非無故而云然也。至其事件之來而生也。而次數少也。則其事之經過時間也暫。通過空間也狹。既無成文法典之可依。又無慣習成例之可憑。於此又將據何術以應之。則有民彝懿德以爲之先導也。民彝懿德者。

謂民生而秉有之常性。純善而無惡之美德也。亦名天理良知。天理者。天生自然之條理也。孟子曰。人之所不慮而知者其良知也。又曰是非之心知也。無是非之心非人也。由是以觀。人既生而有此民彝懿德天理良知。則事物之來。雖千頭萬緒。不可紀極。而吾持此性此德此理此智以應之。則所謂規矩誠立。不可欺以方圓。而天下之方圓。不可勝用矣。尺度誠陳。不可欺以長短。而天下之長短。不可勝用矣。此本律第一條所以又有無慣習法者依條理之規定也。獨惜其所謂依條理者。不若云依天理之爲愈耳。蓋天理自有天然的條理之意。今不曰天理而曰條理。吾未見其當也。



廣東台山縣前街
寶泉銀號

BO CHIN
Toy Sun City
Canton China

第三期

本號專做滙兌按揭附貯找換生意兼
理外洋書信各兄弟親朋如有賜顧請
按照上列中西字門牌附來定當週至
無誤此佈

▲定期存款利息

六個月期週息四厘

一年期週息五厘

長期及特別存款利息另訂

總理 伍洪南

司理

伍熾明

伍宣烈

伍洪慶

伍洪魯

啓

三

文苑門

咨請省長正學術以弭亂萌文

前廣東議員伍瑤光

竊維滔天之患。始於微波。雨雪之來。先維集霰。學術之邪正。其始起於一二人之言論心思。而其後遂足以禍福天下。流被後世。此中消息甚微。不可不慮也。近世歐洲學者。脫宗教迷信之束縛。言論得以自由。其間如達爾文斯賓塞輩。創物競天擇。優勝劣敗之說。而強權之習興。伯倫知理主犧牲人。民以爲國家之論。而國際之界嚴。邊征倡人生主觀。唯在樂利之言。而功利之學盛。其中人心也。則其道德之觀念微。而權利之競爭烈。其中於國家也。則侵畧之主義張。而鐵血之防維甚。吾國偉人巨子。狃於歐洲一時之強盛。從而翻譯之。傳播之。幾以爲天經地義之不可磨滅矣。

而其究也。歐洲各國。連橫合縱。不可究結。殺人至數千百萬而不知恤。西儒託爾斯泰。求其故而不得。以爲科學足以殺人。吾以爲科學亦何禍於天下。歐洲之禍。權利學說禍之也。今則翻然覺悟。宗旨又變矣。吾華太古民族。榛榛狉狉。知有母不知有父。即西人所謂圖騰社會也。古先哲人。乃定爲五倫之教。使父子有親。夫婦有別。兄弟有序。君臣有義。朋友有信。聖聖相傳。至春秋孔子時乃大定。讀史至東西。漢南北宋之際。朝廷雖擾攘於上。而草野之間。人人知重節義。崇禮讓。未嘗不肅然敬之。若論國勢。則吾華立國。始不過黃河流域。爾浸及於揚子江流域。浸又及於珠江流域。其宗教勢力。影響乃徧於東南亞細亞。五倫之教。何害於人國。今雖凌夷衰微矣。有志之士。思有以救弊補偏之。對於個人。則提倡獨立自治。使皆有自由平等之精神。斯亦足以爲治矣。乃今泰西一二學者。提倡共產主義。無政府主義。無父主義。父妻主義。吾國所謂新學家。

又從而翻譯之。傳播之。幾欲取中國數千年五倫之教。根本取消以爲快。夫以中國今日道德之凌夷。人心之弊壞。與夫社會上種種不良之習慣。雖以泰西極良之政。治之中國。未見其利。反見其弊。而况此等學說。法國大革命時代。施之已不能行。今日俄羅斯勞農政府。亦只在試驗中。而厭故喜新之士。乃欲舉吾國而付之一擲。且從而標幟之曰新文化。吾竊以爲五倫之教。如日月之經天。江河之緯地。無一而可廢也。今日共和政體。似乎無君矣。不知古所謂君臣者。指上下尊卑言之耳。非指臣僕之對於專制皇帝言也。左傳有十臣之說。如公臣卿。卿臣大夫。大夫臣士。士臣皂之類。足證君臣者卽上下之名詞。攷之經傳。皆可取證。今乃并父子夫婦之倫而亦廢之。使復返乎圖騰社會。以子女從父爲無人格。以男女戀愛爲天性自由。以共產公妻無父無政府爲無上目的。甚者乃倡萬惡以孝爲先。百行以淫爲首之說。人慾橫流。天理滅絕。洪水之禍。卽在目前。其大亂

又安有紀極耶。本席爲世道人心起見。擬請

省長維持學術。其主張此學說之人。不可令其任教育機關。使青年學子。

受其煽惑。區區愚見。是否有當。敬候 公決

謹按右議案一篇。乃前廣東議員伍君瑤光所作。對於維持風教。十分握

要。其於孔教五倫之理。尤爲推重。洵足稱議員之職。茲從友人處抄出

。特爲刊登。宗壇謹注

D 調 孔子周流列國歌 $\frac{4}{4}$

3—2 1 3 2 | 1 1̇ 6̇ 1̇ | 5 5 3 1 | 2—○ |
周 流乎 齊陳 楚蔡兮果 何為是栖 栖

3—2 1 3 2 | 1 1̇ 6̇ 1̇ | 5 3̇ 1̇ 2.2 | 1—○ |
欲 救吾 民之 陷溺兮知 其不可而 為

7 1̇ 1̇ 2̇ 2̇ 5̇ | 5̇ 6̇ 5̇ 1̇ | 1̇ 6̇ 4̇ 6̇ | 5—○ |
望 堯舜大同之 邦治兮韶 舞想夫唐 虞

3—2 1 3 2 | 1 1̇ 6̇ 1̇ | 5 3̇ 1̇ 2.2 | 1—○ |
天 將以 夫子 為木鐸兮 巍巍萬世之 師

趙宗壇
盤瑤光譜合

和趙嶧山學長晤珠峰同學元韻

南屏桂坵南海翰林

廣雅書堂三十載。尼山道統二千年。爲扶元氣擔當重。欲挽狂瀾覺晤先。講學而今同輩少。匡時難得似君賢。珠峰培植皆楨幹。漫作尋常文字緣。

甲子生日賦詩自遣

台中校教習 麥硯池

校園松竹兩青青。明月清風入畫屏。黃卷課餘聊市酒。綠醪斟罷復談經。幸無車馬勞形體。賴有琴書養性靈。奉勸羣公同一醉。敢將雅集繼蘭亭。謹按麥教習硯池先生。在台中中學當教習。十有一年。除教育事業外。無一別事縈撓其心。昨四十初度。同事黃仿舟校長。特請各校教習。及邑中文人。爲之開筵上壽。各學界中人亦群相請讌誌賀。以表其教育台人子弟之熱心。觀先生此詩。可以見其志趣之恬淡矣。

讀時中月報題辭

袁少枚

台南餘子老袁郎。時中月報讀琅琅。大文轟傳嘆煌煌。言爲心聲非色莊。
儼然親炙乎素王。善誘循循分捐狂。中華民國病膏肓。廢經不讀無良方。
先生救世具熱腸。演講大同走徬徨。謂此聖藥勝岐黃。喚起民疴罔不臧。
孔教會立陣堂堂。羣而不黨異蝸蟻。群言衷聖意味長。人心夢夢醒黃梁。
健筆直書言洋洋。游夏之徒莫贊揚。文如旭日昇扶桑。天下皆曉道益彰。
泰山巖巖吐光芒。樸學不效時髦裝。霧市妖消掃糝糠。救世名言當慈航。
混濁世界鳴歸昌。亂賊時代麟呈祥。言可爲表行爲坊。勿剪勿伐召伯棠。
挽回厄運氣至剛。文中子後魯靈光。悲哉黨爭逞智囊。不重禮讓龍占亢。
中原逐鹿戰雲忙。血滿長城與三江。神號鬼哭震大荒。令人却憶古戰場。
禍水紛飛勢莫當。惟有搔首問彼蒼。哀哀浩劫咸恐惶。魔道發達人道亡。
拜金主義貪風翔。鼠雀俱窮彼厚藏。自由行惡胡荒唐。總統專制如帝皇。
販生學識本尋常。救時策曰孔教良。三綱五常卽國防。此外議案難商量。

靜把國教來參詳。不定一尊多披猖。四書六經爲主張。治中國兮此文章。羽翼文宣姓名芳。維持國教是何傷。急就章成飛羽觴。愧我手筆遜王楊。



要聞門

大元帥對粵之宣言

最近數十年來、中國受列強帝國主義之侵畧、漸淪於次殖民地、而滿洲政府仍牢守其民族之特別階級、與君主之專制政治、中國人民、雖欲自救、其道無繇、文乃率導同志、致力革命、以肇建中華民國、爾來十有三年矣、原革命之目的、在實現民有民治民享之國家、以獨立自由於大地之上、此與帝國主義、如水火之不相容、故帝國主義、遂與軍閥互相勾結、以爲反動、軍閥既有帝國主義之後援、乃悍然蔑視國民、破壞民國、而無所忌憚、革命黨人與之爲死戰、而大多數人民、仍守其不問國事之習、坐視不爲之所、於是革命黨人、往往勢孤而至於蹉跌、十三年來、革命所以未能成功、其端實繫於此、廣東與革命關係最深、其革命擔負亦最重、元年以

來、國事未寧、廣東人民、亦不能得一日之安、九年之冬、粵軍返旆、宜若得所藉手、以完革命之志事、而曾不須臾、典兵者已爲北洋軍閥所勾引、遂以有十一年六月之叛亂、至十二年正月、藉滇桂諸軍之力、僅得討平、然餘孽猶盪聚於東江、新附復反側於肘腋、曹琨吳佩孚遂乘間抵隙、嗾贛軍入寇北江一帶、西江南路、亦同時嘯起、廣州一隅、幾成坐困、文率諸軍、四圍衝擊、雖所向摧破、莫能爲患、然轉輸供億、苦我廣東父老昆弟至矣、軍事旣殷、軍需自繁、羅掘多方、猶不能給、於是病民之諸捐雜稅、繁然並起、其結果人民生活、受其牽掣、物價日騰、生事日艱、夫革命爲全國人民之責任、而廣東人民、所負担獨爲多、此已足致廣東人民不平矣、而間有驕兵悍將、不修軍紀、爲暴於民、貪官污吏、託名籌餉、因緣爲利、馴致人民之生命自由財產、無所保障、交通爲之斷絕、塵市爲之彫敗、此尤足令廣東人民歎息痛恨、而革命政府所由旁惶夙夜、莫知所措者

也、廣東人民身受痛苦、對於革命政府、漸形失望、而在商民爲尤焉、殊不知革命主義爲一事、革命進行方法又爲一事、革命主義、革命政府始終盡力、以求貫徹、革命進行方法、則革命政府、不憚因應環境以求適宜、廣東今日此等現狀、乃革命進行方法未善、有以使然、於革命主義無與、若以現狀之未善、而謗及於主義之本身、以反對革命政府之存在、則革命政府、爲擁護其主義計、不得不謀壓此等反對企圖、而使之消滅、三十餘年來、文與同志實行革命主義、不恤與舉世爲敵、微特滿州政府之淫威、不足攪吾懷抱、卽舉世之訕笑咒詛、以大逆無道等等惡名相加、亦夷然不以爲意、此廣東人民所尤稔知者也、故爲廣東人民計、爲商民計、莫如擁護革命政府、實行革命主義、同時與革命政府、協商改善革命之進行方法、蓋前此大病、在人民仍守其不問國事之習、不與革命政府合作、而革命政府爲存在計、不得不強力取資於人民、政府與人民之間、遂生隔膜、今

者革命政府不恤改絃更張、以求與人民合作、特鄭重明白宣佈如左、(一)在最短時期內悉調各軍、實行北伐、(二)以廣東付之廣東人民實行自治、廣州市政府廳尅日改組、市長付之民選、以爲全省自治之先導、(三)現在一切苛雜捐稅、悉數蠲除、由民選官吏另訂稅則、以上三者、革命政府已決心實行、廣東人民當知關於革命之進行方法、革命政府、不難徇人民之意嚮、從事改善、惟我廣東人民、對於革命之主義、當以熱誠扶助革命政府、使早日實現、庶幾政府人民、同心同德、以當大敵、十三年來革命未就之緒、於以告成、中華民國、寔嘉賴之、

北京政變電

(上海專電)二十三日晨、馮玉祥軍張之江旅、及第十一師步兵三團炮騎團入京、下午胡景翼陝軍亦入京、約三萬人、衛戍司令孫岳派隊與馮軍聯合、包圍總統府、府衛隊三千均被繳械、曹琨二十二日晚召集緊急會議謀逃

其時孫岳派已迎馮軍入城、曹欲逃不得、馮玉祥宣言停止國內戰爭、由各派協議國是、迫曹先下令免除吳佩孚各職、然後自行下台、曹表示亦願下野、馮玉祥將聯王承斌、王懷慶、胡景翼、閻錫山等通電、請段祺瑞出山、暫維現局、待全國議解決國事、張作霖亦已諒解、馮將派二旅駐天津、胡景翼派二旅駐唐山、堵截吳佩孚歸路、張作霖早與馮約定反戈、故抽調熱河軍由張宗昌統率由冷口退逼灤州、榆關直軍廿二晚全部退往秦皇島、▲廿四號路透社北京電、北京政變、于夜間突然發生、居民尚在酣睡中查各軍團近日決定停止戰爭、預定由馮玉祥回北京主持、其他各軍則設法拒阻吳佩孚回京、於是馮部密離古北口回京、于廿二號晚抵京外、至廿三晨早守城防軍開門放馮軍入城、即截斷各項交通、據守各公署與公用物、隨由馮之第十一師全部分駐城中各要地、圍困總統府、又拘禁財政廳長王克敏及總統府軍事處長李彥青、在京中預謀者只一班著名少年派、如教育總長王

鄂王正廷等、現皆竭力設法從速恢復平常秩序、此團體宣言、決志令戰事終止、後乃開聯席會議、請張作霖、孫逸仙等首領赴會、冀建設一強固政府、統一中國、總統府現被包圍、所有至府街道均被馮軍駐守、但王正廷謂曹琨之生命必無危險、現山東隊軍北上赴廊坊、在京津間阻吳佩孚歸路、觀此次政變、牽涉甚大云、▲馮玉祥軍廿三日入京、馮迫曹琨下四令、

- (一) 停戰候結束、抗令者強行制止、
- (二) 討逆總司令各職、概行撤銷、
- (三) 榆關軍隊責成王承斌彭壽莘維持、
- (四) 免吳佩孚巡閱使及第三師長職、

改任青海墾務督辦、令下後顏閣總辭職、曹馮均挽留、▲馮玉祥廿三日通電組織國民軍、揭布主戰罪狀、請全國賢達會商善後、又廿四日通電擬定建國大綱五項、(一) 建設清廉政府、選用賢能、(二) 對內行親民政治、(三) 對外購信修睦、(四) 信賞必罰、(五) 財政公開、▲吳佩孚廿五日自秦皇島通電討馮玉祥、大意謂奉曹琨密令、率兵入衛、會師討賊、匡復京國

馮玉祥受命討逆、責任重大、乃未聞遺矢、先已倒戈、中央元首、視等弁髦、佩孚一面激勵將士、聲罪致討、一面會師京津、清除內奸等語、▲北苑政治會議、決召元老會、電段祺瑞王士珍趙爾巽田文烈唐繼堯岑春煊唐紹儀孫文張謇等來京會議、或派代表出席、惟未邀張作霖、決組臨時內閣、又雷馮玉祥等請段祺瑞就國民軍大元帥職張作霖亦請段爲聯軍總司令▲曹琨罪已退職由內閣攝政等令、三十一日夜即擬就、定一日晚發表、鹿鐘麟入府守印、一日晚曹琨辭職電已發、內有辱荷兩院選舉、任職經年、誠不服衆、威不遠馭、海內騷然、兵戈四起、清夜捫心、深用愧悔、除令停戰外、謹於東、(一日)宣告退位、還我初服、以讓賢者等語、聞一日鹿鍾麟派兵入府示威、曹琨始將辭職罪已令蓋印▲一號路透社東京電、奉天來電、謂官報佈稱、奉軍已于十月三十號、半夜完全佔領山海關、秦皇島北戴河、劇戰兩天、俘直軍三萬人、及第二十四師長楊正清、并獲砲一百

尊、槍三萬枝、張作霖與盧永祥通電各省、舉段祺瑞爲討逆軍總司令、討
 吳佩孚曹錕、▲奉軍在榆關秦皇島繳直軍槍三萬餘桿、彈無數、收容萬人
 、編入國軍、張福來以大勢已去、派人到京與胡景翼商和平辦法、▲胡馮
 軍一日擊敗楊村吳軍、二日佔楊村、俘魯軍旅長潘鴻鈞、二日後進佔北倉
 、吳潰退至天津新站、吳在激戰包圍中、戒司令嚴李榮殿逃、▲三日吳佩
 孚率殘部、由塘沽乘輪南下、▲馮胡軍三日由北倉進天津、在各車站收繳
 吳部潰兵槍械達六千以上、▲閣議通過廢清室優待條件、日五早馮玉祥派
 兵入清宮、勒令溥儀退位、將全部宮殿及玉璽交出、并派兵監守清宮寶物
 、限溥儀於即日午下三時出宮、自由擇后邸、財財產屬公家者歸民、私有
 者仍歸溥儀、聞優待費將由四百萬減至五十萬、▲五日晚明令修正清室優
 五條、「一」廢除溥儀帝號、同享國民權利、「二」民國年助溥儀費用四十萬
 、特支二百萬辦旗民工廠「三」清室出宮自由擇居、民國仍任保護、「四」宗

廟陵寢永遠奉祀、并由民派兵保護、「五」私產歸清室、公產歸民國、▲張璧鹽鐘麟李石曾五日午、帶兵入宮見溥儀索玉璽、修正優待條例、溥儀即開御前會議、決定照辦、交出國璽二顆、鹿派汽車護送溥儀眷屬至醇王府▲透社烟台電、吳佩孚四萬人在漢口、在南京者亦多、均候其命令發動、▲十日天津會議結果、國是悉由元老會議解決、各機關暫維現狀、不事更張、對江浙大局聽其自然變化、暫不用兵、(十一日)▲馮玉祥組織救國聯合會、舉段祺瑞臨時大總統、孫文爲和平統一會長、▲天津附近奉軍仍駐萬餘、李景林張宗昌等新編四混成旅、共七萬餘人、佈滿津浦京津兩路線、俄軍駐楊村、京津全局已歸奉軍控制、▲吳佩孚十二下午四時乘華甲艦永翔護過吳淞口、溯江赴南京、南京十二日有重要會議、齊燮元等特於灰(十日)發電擁段祺瑞中有「我各省已謀聯合、對國事一致主張、願念國事不可無人主持、懇段公尅日出山」等語(十四日)張作霖▲王承斌收吳佩

孚部改編廿三師、又馮玉祥新編北倉兩混成旅、均被李景林繳械、王衛隊亦同王辭職、▲吳佩孚乘華興船、十四日晨離吳淞上駛、十五日丑時抵南京、齊燮元杜錫珪及直系代表均下艦會議、▲上海電云、段祺瑞表示以孔孟之道爲主體、西學爲應用、馮玉祥亦表示以傳統之道德文化治國、輔以科學、

段祺瑞之政綱

據段氏及左右人所露之消息段氏之政綱現方決行澈底的民國改造一洗第一次革命以不澈底而終結之結果及內亂十三年之痛苦的歷史其大致決定之各項爲(一)民國以來之各種施設全作爲國會憲法等亦須革新即如國號紀元等倘能改稱即新定之(二)軍權及交通權確實集於中央以絕地方內亂之根源使文化政策易於樹立(三)地方行政區別內省及邊境內省以郡縣爲基本使地方自治澈底邊境軍民自治但內部之組織以省內爲準其邊防軍之編制及師旅之

配置等依中央之命令設一定之制限(四)不行裁兵其過剩兵力使屯田於西北地方並興起地方上交通通信生產等足以助長地方文化之土木工程使兵士爲之(五)廢止爲中國禍根之督軍巡閱制度(六)特別有功之元勳與國老之稱號而優待之登庸人材適合之人材分配於適宜之職位排除徧重一黨一派或私的勢力之弊害(七)召集中央及地方上有勢力各界代表開國民大會俟議決上開各項後即決定爲憲法大綱以定新民國之基礎(八)整理無担保之外債並聞上海方面所唱之委員制段祺瑞張作霖孫中山等亦均反對之

歡迎孔教會會長

公益區立學校員生、昨日請孔教會會長趙宗壇先生到校、演講孔教道德、該校長撰有歡迎歌云、陰雲慘淡莫開、痛神州、陸沈災、道德淪喪可哀、人心已死、國勢苦難回、登舞臺、力挽救兮、願宏志壯哉、西遊合衆國、加拿大歸來、挽狂瀾、雪劫灰、台山市、孔教開會、醒國魂、正民德

然是通才、青年羣學子、道德性、賴栽培、噫、人心本惟危、道心不可摧、尊孔衆同志、昌明聖道、璀璨三台、璀璨三台、當時學生唱得激昂慷慨、按節合拍、隨請先生登壇演講、闡發孔教倫理、詞旨通達古今中外、親切有味、演畢、掌聲如雷、學生再唱國歌、一旬鐘、由孔教分會員、請到商會所演講、區立學生鼓樂前導、到場後、先唱尊孔教、然後演講、聽者擠擁異常、歷一半鐘之久、于倫理精要、發揮盡致、聽者忘倦、翌晨、在區立操場攝影、旋附輪往新昌荻海赤坎等埠、提倡孔教、趙先生熱誠毅力、洵不可及歟、

畢業揭榜

三合墟康和學校第十期癸班畢業生、共十四名、茲由校長陳璧珊核對歷年成績、均能及格、茲將榜上姓名列后、陳錦裕、陳榮祿、陳俠夫、鄺子濯、陳其珍、陳兆唐、馬如炳、陳泗源、陳榮彬、馬瑞昌、陳汝榮、陳樹湖

、岑錫彬、陳毓棠、現聞出省升學者、經有多名云、
水南堡南強高小學校開辦以來、頗著成績、校長周君毓初、卽孔教研究會
同人也、聞現辦第三次畢業、學生周爾杰陳袞壬陳金相陳兆華陳堯煥等、
各學科分數均優、經奉劉縣長轉呈廣東教育廳長、核准畢業、印發證書、
該畢業生等、多赴考廣州市立各校升學云、

台山新中學校舍奠基日紀盛

新建台山中學校舍、於昨十月十號、舉行奠基禮、是日適值國慶紀念、台
城各學校各團體員生、先于上午十時、舉行國慶巡遊、巡行城廂內外、到
十二時、列隊齊到新建中學校場助慶、是日也、天朗氣清、秋風送爽、校
場入門之總路、高搭牌樓一座、上懸橫額一幅、綴以歡迎二字、校舍中座
大門口、則搭露天禮場一座、面積廣闊、可容百數十人、上豎大國旗一、
兩邊懸週番旗、及紙花、以爲點綴、擇南課堂第一層游廊之房舍、爲來賓

招待廳、二樓課堂爲來賓茶會廳、中列椅桌、襯以花瓶、瓶中插滿生花、茶點餅菓、雅潔精緻、陳設齊備、布置井然、下午一時開會、由趙宗壇先生主席、黃笏南先生宣布、其禮式、一齊集、二宣布開會、三請劉縣長立奠基石席、四奏樂、五向國旗行三鞠躬禮、六唱民國國歌、七立奠基石、同時奏樂鳴炮、八唱奠基歌、九讀祝詞、十讀答詞、十一來賓演說、十二奏樂、十三禮成、十四拍照、十五茶會、十六散會、當立奠基石之際、原定劉縣長蒞會、適是日劉縣長政躬抱恙、派教育局梅局長代表蒞會、即由梅局長將奠基石立於中校大門口左邊磚柱內、該石文曰、是校捐款、起於中華民國九年二月、建築始于十二年六月、行奠基禮在于十三年國慶日旅坎邑僑公立字樣、立石事畢、請各來賓演說、偉論鴻詞、娓娓動聽、至各學生所唱之奠基歌、爲中校奠基之新成樂歌、聞係黃君灼棠所撰者、是日到會、各來賓及各機關團體人員、台山商團附城十九校員生等、約三千餘人、國旗飄颺、鼓聲震耳、禮畢拍照、登樓茶會、復相繼演說、拍照盡歡而散、洵極一時之盛也、

附錄門

孔教研究會會員題名錄

黃灼棠 黃宜琳 各五元

馬竹卿 三元

李袞宸 陳煥吾 雷景雲 趙仁三 王少樵 雲躍池 伍國恩 朱國然

李双南 梁伯華 朱邦彥 鄭士英 李紹漢 賴廣萬 李雁行 余兆亨

余觀光 龔伯欽 盤瑤光 張廷禧 黃仿周 麥敏田 趙次山 黃仁山

趙玉磬 葉偉雅 陳挺秀 黃翼 譚李氏 李明超 張麗卿 朱彬如

林雁秋 周香池 伍潤三 林幹 張荔峯 李芹波 雷樹枝 譚拔實

譚夏持 周毓山 陳思美 陳之璇 康毅朋 梁仙皿 文弼士 譚劍佩

譚士彪 譚金鰲 曹翰槐 黃瑞雲 梁吉堂 劉晚成 李重常 李樞
劉琴石 蔡幾修 熊覺生

以上台山縣城各學校校長教員會費已同各學校名冊彙繳餘俟下期續登

李明倫 黃良渭 譚典文 李蘭明 李聖熊 黃仿世 李道常 李昶聖
李聖淙 伍傑生 譚開岳 譚裔燁 雷景雲 林德召 伍于樟 錢君理
朱珍堂 黃傳億 雷景珊 陳瑞超 黃超群 朱開善 朱介吾 黃叔陶
黃新霖 黃汝霖 陳榮相

以上各捐會費壹圓餘俟續登

各處分會繳來會費報費銀數

各處分會繳來費報費銀數

開平潭邊院謝氏廣今學校會員共銀一十五元三毛

開平第三區團保局捐時中月報銀二十元送回月報八份一年爲額

荻海余氏仁傑學校會員銀一十一元八角

荻海分會余惠潭會長來會員銀十元

荻海育正學校會員銀一十一元七毫

荻海存著學校會員銀壹拾玖元貳角

荻海雙竹學校會員銀二十七元六毫

鄒村鑄才學校會員銀玖元壹毛

桂水潮澗學校會員會報費共銀陸元玖毛

水南南強學校會員銀壹拾叁元伍角

都斛分會陳典墳來會報費共銀壹百零肆元

潮境分會黃鏡秋會長來會費銀壹百元

白沙南蒞宏聰兩學校會員來會報銀二十五元

倉下道昌學校會員銀捌元肆毛

廣海樹德學校會員銀捌元肆毛

公益植才學校會員銀柒元貳毫

公益華英學校會員銀陸元肆毫

公益崇實寧武兩校會員銀共伍元陸毛

新昌埠分會伍沃如會長來會員銀柒拾捌元

南昌村育才學校會員銀貳拾壹元陸毛

會員冊姓名已逾七千。下期續登。

